

Ուսուցիչը պիտի ջանայ աշակերտուհուն սովորեցնել եւ կրթել ամաչեցնելով կամ ամենաշատը՝ պատժելով: Իսկ եթէ այդ ամենից յետոյ՝ աշակերտուհին, իբր «գոռոզ բնաւորութեան» հետեւանքով, կը մնայ այնուամենայնիւ անուղղայ, այդ դէպքում ուսուցիչը կարող է նրան ծեծել, բայց միայն կնոջ ձեռքով, հասցնելով «մինչեւ 9 դամչի եւ միշտ ըզգոյշ լինելով, որ «չխաթարուի նրա պատկերը», որ «չկտորուեն սակրները» եւ «անխարատելի վախը չընկնի նրա սիրտը, որը կը զրկի նրան որդեծնութիւնից» (յձք):

Շահամիրեանը կնոջ եւս թոյլատրում է, տղամարդուն հաւասար, ժառանգութիւն ըստանալու, չափահասութեան հասակը երկուսի համար էլ այդ դէպքում 21 տարին դնելով (նձդ): Կինը կարող է վկայ լինել (վնք), բայց երաշխաւոր՝ ո՛չ (վք): Եթէ նա ամուսնացած է եւ ամուսինը ներկայ, չի կարող մուրհակ տալ (նղդ). իսկ եթէ ամուսինը առեւտրական գործով բացակայ է, նա կարող է մուրհակ տալ, բայց մի տարուան ընթացքում 200 արծաթ դահեկանից ոչ աւելի (նղե):

Միւս հասարակական կատեգորիան, որի վիճակը նոյնպէս շատ է զբաղեցնում Շահամիրեանին — դա մարդկութեան ընդհանրապէս այն թշուառ հատուածն է, որը դատապարտուած է, մանաւանդ անբաղաբակիրթ երկրներում, ուրիշների վրայ ծանրանալու եւ նրանց հաշուով ապրելու — ծերերը, պառուները, կաղերը, կոյրերը, անդամալոյծները, հիւանդները, աղքատները եւ բոլոր նման տարրերը, որոնք չունեն — ինչպէս հեղինակն է ասում — «իրենց միտքարող որդիներ կամ աղջիկներ» (նկա):

Այդպիսիներին «միտքարում է» հայոց տունը կամ հայոց պետութիւնը, որը իր վերայ է վերցնում ոչ միայն նրանց սնունդը, այլ եւ պահպանութիւնը, խնամքը, բժշկութիւնը, ղեղերը եւն.: Պետական բիւջէի մէջ այդ նըպատակով ամէն տարի մտցւում է, 3 տարբեր յօդուածներով, 300,000 դահեկան, որից ծախս «տան սկստաց» — 100,000 դահեկան, «ծախս ղեղօրէից եւ վարձ բժշկաց» — 100,000 դահ. եւ «ծախս տան աղքատաց եւ տնանկաց» — 100,000 դահ.:

Գործի ղեկավար մարմինը 3 հոգուց բաղ-

կացած կոլլեգիան է, ընտրուած Ազգ. Ժողովից: Իւրաքանչիւր նահանգում, գլխաւորապէս նահանգի կենտրոնում, կոլլեգիան պահում է համադատասխան տներ տկարների, որբների, բորոտների եւն. համար: Այդ տները, յաճախ նաեւ ամբողջ գործի կազմակերպութիւնը, կոչւում են «տուն ողորմութեան»: Ամէն մի «տուն ողորմութեանը» կառավարում է 7 հոգուց կազմուած մի մարմնով, որոնք ընտրւում են 3 տարով եւ հաւանօրէն խնամատարութեան կոլլեգիայի կողմից (նհք): Նըրանց գլխաւոր հասոյթը գոյանում է աւգանքներից. պետական բոլոր տուգանքները գանձւում են «տուն ողորմութեան» անունով: Անգամ անհատները իրաւունք չունեն փողոցի մուրացկաններին, աղքատներին առանձին ողորմութիւն տալու. նրանք իրենց ցանկացած ողորմութիւնը տալ կարող են միմիայն «տուն ողորմութեան» միջոցով (նհը):

Որպէս լրացումն այս գլխի՝ բերենք երկու հետաքրքրական օրէնք եւս, որոնց նպատակն է, անշուշտ, զարկ տալ հայ ժողովրդի աճեցմանը. —

1. Եթէ մէկ ամուսնութիւնից ծնողներն ունենում են 12 որդի, սրանց հացը — օրական 12 հաց — ծնողները, իրենց կենդանութեան ամբողջ ընթացքում, ստանում են պետութիւնից (վզ):

2. Հանրապետութեան ամէն մի նոր նախագահը, իր պաշտօնի կոչուելու սկզբին, ուրեմն երեք տարին մի անգամ, ուղարկում է բոլոր կուսանոցներն ու վանքերը 12 հոգի, «խոհեմ, հեզ, երկայնամիտ եւ հասակաւ լիքն, իրբեւ հալեւոր» մարդիկ: Սրանք իւրաքանչիւր վանականին ու կոյսին զաղտնի խոստովանեցընելով, պէտք է խմանան, թէ արդեօք նրանք չեն ցանկանում թողնել վանքը եւ աշխարհ մտնել: Յանկացողների թղթով այդ 12 հոգին վերադառնում են հանրապետութեան նախագահի մօտ եւ սա յատուկ գրութեամբ խնդրում է Ամենայն Հայոց Կաթողիկոսին՝ այդպիսիներին ազատ արձակել եւ թող տալ ամուսնանալու (յձգ):

ՄԻՋԱԶԳԱՅԻՆ ՕՐԷՆՔՆԵՐ

Շահամիրեանը, որ ամենայն խնամքով աշխատում է նախատեսներ ապագայ Հայաս-